

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 1 (1897)

Artikel: Adalbert II. de Medell-Castelberg, avat de Muster e prenci digl imperi, 1655-1696

Autor: Cahannes, g.

DOI: <https://doi.org/10.5169/seals-881811>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Adalbert II. de Medell-Castelberg, avat de Muster

e prenci digl imperi, 1655—1696.



Nus sesanflein dapresent ella perioda dils giubileums. Igl ei senza dubi ina biala enzenna de pietat ed engraziament, ed el medem temps in elevont ed edificont patratg, de seregordar dellas grondas qualitats ed ovras de quels, che han tras eminent spert ed activa veta sefatg meriteivels pils vgnentsuenter. Ed in tgau, che patratga raschuneivel, vgn buca sentardar de renconuscher vers merets, *nua ch'els semuossan*; pertgei la verdat va sur tut e noschescha mai. Sch'igl ei aber ver, ch'ins sa sefar culponts della manzegna buca mo tras dir la nunverdat, sunder era en in cert sen tras *quescher* la verdat, sche astgein nus cheu bein exprimer il penibel sentiment, che surpren nus, vesent, co nus gidein savens ad alzar merets jasters, enqualga aunc empau dubius, ferton che nossa pli atgna gleut restan per nossa cuolpa satrai en emblidonza. — Ei selai tgunsch comprender, ch'igl ei uon da surengiu vegniu ordinau la festiva celebraziun de Pestalozzi; ei para aber meins capeivel, ch'il pievel cartent e catolic

svizzer sappi sper il cult d'in Pestalozzi emblidar vi dil tuttafatg umens, che stattan ad el *bia pli datier*.

Ne han in *Alfons Liguori*, naschius 1696, in *Adam Möhler*, naschius 1796, quellas terlischontas figuras dell' historia nova ecclesiastica, buca schau anavos merets, vengonzs d'esser renconuschi buca mo a casa lur, mo-bein aschi lunsch sco la baselgia tonscha, el survetsch della quala els han operaу? Mo nuslein serestrenscher sils confins de nossa Svizzera.

Il December 1795 ei miert ella claustra de Rheinau, mervigliusamein situada enamiez las sturtigliadas dil Rhein, sut sia cascada sper Schaffhausen igl erudit pader *Moriz Hohenbaum van der Meer*, in um buca meins gronds tras ses talents e siu spert, sco tras sia veta e nunstunclenteivla activitat. Da quella dattan eloquenta perdetga sias numerusas ovras manuscrettas, il pli relativas all' historia dellas claustras e dils uestgius della Svizzera. Sil 100avel di de sia mort ha da nies saver mo il redactur dellas „Zürcher Nachrichten“ dedicau entgins plaids al niebel benedictin. — Semigliont silenci ei vegniu teniu visavi ad in auter fegl de s. Benedictg, il qual ses merets han alzau tochen tiella dignitat de cardinal. Nus manegein il pietus e perdert *Celestin Sfondrati*, avat de S. Gagl, morts a Ruma il Settembre 1696.¹⁾

Biebein miez onn avon, il Fevrer 1696, ha a Muster in amitg e confrar dil numnau prelat de S. Gagl, igl avat *Adalbert de Medell-Castelberg* concludiu sia veta

¹⁾ L'„Ostschiweiz“ ha portau sco feuilleton ina cuorta s'chizza biografica de Sfondrati, ord la plema de Mgr. Egger, uestg de S. Gagl (era separat). — Pli baul ei ina tala, da J. Eisenring, stud. phil., comparida ellas Monatrosas dell' uniun de students svizzers, 1890.

terrena. Igl ei quei in um, che meretta de vegnir quintaus denter ils gronds avats della claustra ed ils gronds fegls de nossa Surselva. Silla fossa de quel, ussa gest 200 onns veglia, duein las sequentas paginas formar in simpel tschupi. Il limitau spazi e cuort temps concedi agl autur han denton obligau quel, de tener sia raquintaziun en confins ualtri stretgs, e de resalvar sin pli tard ina pli intensiva e completa apprezzaziun dil meriteivel um. Il sequent sefundescha principalmein silla „*Synopsis Annalium Monasterii Disertinensis*“, in’ historia della claustra de Muster, scretta all’ entschatta digl 18avel tschentaner. Ord quei datum selai prender, che las notizias sur ’gl avat Adalbert de Medell contenidas ella Synopsis ein da nundubiusa valeta, essent igl autur de quella in contemporan dil numnau avat. Leu nua ch’el decuors della raquintaziun aunc otras fontaunas ein tratgas neutier, ei quei conscienuisamein notaou ellas remarcas.

All’ entschatta dil 17avel tschentaner fuva la situaziun della claustra de Muster ina buna. Avat *Christian de Castelberg* (1566—84) haveva suenter ils orcans della reformaziun restaurau la casa de Diu cun energia e success.¹⁾ El medem spert ha luvrau vinavon igl avat *Nicolaus Tyron* de Trun (1584—93). *Jacob Bundi* (1593 fin 1614), enconoschents tras il dad el fatg e descret viadi a Jerusalem e sia cronica della claustra, ha mess neu flurentas finanzas. — Igl ei vegniu auters temps.

¹⁾ Sur ’gl operar de quel, sco era pervia d’ina cuorta orientaziun sur l’anteriura historia della claustra renviein nus il lectur silla lavur el Calender Romonsch 1884, p. 16—63, ord la, ell’ historia della Partsura bein versada plema de Oberst de Hess-Castelberg.

Ils sanguinus embrugls, ils quals caracteriseschan l'emprema mesadat dil 17avel tschentaner d'istoria grischa e formesch an en in cert sen in unic ell' istoria universala, han fiers lur undas tochen si tiel pei dil Badus. La perioda de *Sebastian de Castelberg* (1614 fin 1631, + 1634) ha portau nova decadenza alla casa de s. Sigisbert, ton pli, essent ch'igl avat ei cun forza e piissiu sebess els trubistgems politics e guerigius dil temps. Il nunci papal *Raynuto Scotti* sez ha 1631 effectuau sia resignaziun. Mo era il schierm tier nova fluriziu ei d'encurir ella perioda de Sebastian Castelberg. 1617 ei la claustra de Muster intrada ella niev-fundada congregaziun Hélico-benedictina. Cheutras ei 'gl agid staus scaffius, da tut temps paregiaus de cargar sut bratsch alla baluonta Desertina. Igl onn 1623, ils 5. de December, eis ei reussiu al premurau nunci *Alexander Scapi* de far ceder il cumin della Cadi dal dretg de leger ora igl avat, in dretg, ch'il cumin haveva de facto gudiu dapi la reformaziun. Nuatatonmeins ha igl erudit ed energic *Augustin Stöcklin*, conventional de Muri, lura decan ed administratur a Faveras, ed avat de Muster da 1634 tochen 1641, giu all' entschatta ina greva posiziun visavi al cumin, che leva sin instigaziun de certins far ir anavos la convenziun de 1623. Ina definitiva soluziun han las controversas finalmein enflau tras las convenziuns de 1643 e 1648 sut il secund successur de Stöcklin, avat *Adalbert I. Bridler* (1642—1655), medemamein postulaus da Muri suenter la sperta mort dil prelat *Giusep Desax* (1641—42). 1643 ha il cumin danovamein desistiu dal dretg dell' elezioni digl avat. Perencunter ha el arisguard la retsche-vida della giudicatura obteniu ina concessiun. Tochen uss stueva mintga nievelegiu mistral en solempna cere-

monia domandar e retscheiver dagl avat il „dretg della spada“. Dacheudenvi dueva quei daventar mo *inaga* duront il regiment d'in avat, e zvar el termin d'in meins suenter l'elecziun de quel. Adalbert I. ha cun sabi maun menau il scepter della claustra tochen ils 13. d'Avrel 1655. Ils 30. de Juli sisu ei il giuven conventional *Adalbert de Medell a Castelberg*¹⁾ dals confrars vegnius alzaus silla sedia de S. Sigisbert.

Il niev avat fuva oriunds d'ina veglia schlateina, domiciliada a Sedrun. In *Simeon de Medell* fuva mistral della Cadi igl onn 1493.²⁾ Tiell' allianza serrada giu 1497 denter la ligia grischa ed ils logs confederai figurescha mistral *Hans de Medell* sco deputau dil cumin.³⁾ Igl onn 1512 compara in „*saltair de Medel*“ denter ils commembers della confraternitat della s. Crusch a Glion.⁴⁾ Duront il 16avel tschentaner selai nuot auter udir dalla schlateina. Tiegl onn 1612 e 1617 entupein nus puspei in *Joachim de Medell* en qualitat d'ugau baselgia de Tujetsch.⁵⁾ Sia consorta *Cornelia* fuva ina *Castelberg* e niazza dil gia pliras ga numnau avat Sebastian. Treis figls et ina figlia ein·carschi si entuorn ils geniturs: *Gion*, *Barla*, *Conradin* ed *Adalbert*. Da quels fuva ei principalmein als dus davosnumnai resalvau ina pli gronda rolla.

¹⁾ Aşchia scriveva igl avat sez siu num complet. La fuorma „de Medell“ hai jeu acceptau, essent ch'ella para d'esser stada ualti general usitada dapi il 17avel tschentaner. Dil rest vegn ei bein buc esser dubius, che nossa schlateina dariva primitivamein dal num local Medel.

²⁾ Collecziun de documents de Willi, p. 910.

³⁾ Leu, Helvetisches Lexicon, Theil XIII, p. 1.

⁴⁾ Archiv de Glion, Nr. 83, publicau tras C. Decurtins ella „Disentiser Klosterchronik des Abtes Bundi“, Beil. IV (separat ord das Monatrossas dell' uniun de students svizzers 1887 e 1888).

⁵⁾ Archiv-baselgia de Tujetsch.

Conradin, maridaus cun *Margreta Jagmet*, ha in suenter 'glauter administrau ils pli gronds uffecis della tiara. 1661 eis el daventaus actuar de cumin, 1664 actuar della ligia, 1668, 1672, 1682 e 1683 mistral della Cadi e 1678 e 1684 landrechter della ligia grischa. El ei morts igl 1. de Juni 1691.¹⁾ — Aunc pli gronds dueva daventar siu frar *Adalbert*, il posteriur avat della claustra. Sco datum de sia naschienscha selai eruir ord las fontaunas igl onn 1628. Dil reminent aber queschan quellas sur de ses onns de giuventetgna. Igl ei negin dubi, ch'el hagi en casa paterna gudiu ina buna educaziun.²⁾ Siu aug *landrechter Conradin Castelberg* fuva premuraus, de schar veginir tier al talentus giuven ina pli aulta cultivaziun. Il temps, cu Adalbert ei intraus en claustra, selai buca dar en precis; ton ei franc, che quei ei daventau avon ne enten 1650. Quei onn eis el numnada mein sco candidat della teologia dagl avat vegnius termess a Ruma, nua che Muster haveva tras la generusa intervenziun dils cantuns catolics ual urbiu ora in plaz liber el nievfundau collegi della Propaganda.³⁾ Leu ha Adalbert suenter distingui studis obteniu il grad de Doctor en teologia sin fundament d'ina dissertaziun „*de Deo uno et trino*,“ che ei culla dedicaziun al *cardinal Barberini* comparida a Ruma en squetsch.⁴⁾

¹⁾ Archiv-baselgia de Tujetsch; Leu, Lexicon l. c.

²⁾ La detga populara lai murir la mumma igl onn 1628 sil culm Cungeri sur Sedrun dalla pestilenza, avon la quala ella fuva untgida, ferton ch'ils dus tut giuvens schumalins Conradin ed Adalbert ein mitschai da quella. Mira Theobald, Bündner Oberland, p. 93 e Calender Romonsch, 1884, p. 59.

³⁾ Archiv cantonal de Luzern, actas grischnas, fascichel 13. Pareglia Eidgenöss. Abschiede VI. 1. p. 20.

⁴⁾ C. Decurtins, Mauri Wenzini descriptio brevis communitatis Disertinensis, supplement: Nota manuscriptorum seu typis editorum,

Negin smervegl perquei, che suenter la mort digl avat Bridler tuts ils egls dil convent e della congregaziun ein seviults sin il giuven Adalbert, che dumbrava lu 27 onns. Quel ha, respectont la veglia dils confrars, cun igl anim e l'energia, che ei atgna a quella perioda della veta, tschaffau il scepter e la cana de s. Sigisbert.

Tier sia elecziun fuvan presents a Muster *Barclamiu Sorino*, delegau dil nunci papal *Frideric Borromeo*, ils avats e plirs conventionals de Nossadunnaun, Muri e Rheinau. Ils 29. de Settember dil medem onn 1655 ei il niev avat ella catedrala a Cuera vegnius confirmaus e benedius ora dal nunci Borromeo, e zvar gratis, sco il cronist claustral puntuescha cun veseivla satisfacziun. Il di avon, ils 28. de Settember, fuva numnadamein tras intervenziun dil nunci vegniu serrau giu denter 'gl uestg *Gion VI*. Flugi e 'gl avat Adalbert in contract, tenor il qual la claustra ei era arisguard la benedicziun e confirmaziun digl avat, las qualas fuvan tochendacheu en mauns digl uestg diocesan, vegnida eximida dagl uestgiu. Pli bia muntada haveva ina ulteriura stipulaziun dil contract, suenter la quala la gronda part della pleivs sursilvanas ein sco pli davegl vegnidas puttameassas alla giurisdicziun della claustra de Muster, encounter in pagament de 2000 renschs en favur digl uestgiu. Las pleivs en questiu fuvan las sequentas: quella de s. Pieder e s. Paul ad Ursera cullas filialas a Hospenthal e Realp, quella de s. Vigeli a Tujetsch, de s. Martin a Medel, de s. Gion Battesta a Muster (Cons), de s. Gion Battesta a Sumvitg, de s. Martin a Trun, de s. Gieri a Schlans, de Nossadunna a Breil cullas filialas de s. Martin e s. Sievi, de s. Leodegar a Uors

quæ ab abbatibus et monachis monasterii Disertinensis posteritati relicita sunt, p. 26 dil squetsch separat ord las Monatrosas de 1882.

(dapi 1527 da priedi), de s. Giulitta ad Andiast, de s. Andriu a Rueun, de s. Florin a Siat, de s. Gieri a Russchein, de s. Sein a Ladir, de s. Rumetg a Falera, de s. Plasch a Valendau (da priedi), de s. Gion Battesta a Domat.

Igl uestgiu de Cuera fuva dapi il temps della separaziun de cardienscha curdaus pli e pli afuns en deivets. La ligia della casa de Diu, per la gronda part protestanta, manischava suenter plischer culs beins de quel, e teneva igl uestg ferm sut sia bitgetta. Perquei han repetidamein ils papas *Urban VIII.* (1623—44) ed *Innocenz X.* (1644—55) tras brevs apostolicas ordinau, che las pleivs ella diocesa de Cuera, che eran pli baul incorporadas allas claustras de *Nossadunnaun*, *Faveras*, *Marienberg* e *Muster*, returnien sut l' anteriura giurisdicziun. Quei fuva ina tuttavia gesta idea contrareformatoica; mo ils comonds eran aunc adina restai mo sil pupi. Era la surallegada convenziun dils 28. de Settember 1655, tras la quala papa *Alexander VII.* (1655—67) leva metter en execuziun las ordinaziuns dils predecessurs, dueva stuschar sin nunspitgada resistenza.

Sut datum dils 30. de Settember sisu ha il nunci relaschau als plevons dellas suranumnadas pleivs ina brev, tras la quala el ha sligiau quels dallas obligaziuns visavi agl uestg e tschentau els sut il domini digl avat, smanatschont als renitents cullas censuras ecclesiasticas. Igl uestg para denton de gleiti esser staus enriclaus dil contract. Mo nunastgont passar si direct encunter la sedia papala, ha el priu siu refugi tier pauc vengonzs mettels. En ina redunanza dils plevons sursilvans exortescha el quels, de cun tutta forza far opposiziun alla claustra. Quei ei daventau. Ils spirituals levan pli bugen buc esser survigilai aschi da maneivel; era podevan

els temer, che la claustra vegnessi plaun e plaun occupar las pleivs cun conventuals; ed il pievel veseva nuidis ina memia zun pussenta claustra en siu miez per tema, che quella podessi cul temps far valer vegls dretgs visavi ad el. Desperas fuvan era ils capuzins, dapi 1621 introduci sco missionaris ella Rezia, pli che dueivel prompts, de agitar encunter la casa de s. Sigisbert. Sut talas circumstanzias scriva ils 13. d'October il nunci Borromeo danovamein da Luzern als plevons della Surselva cul comond, de sesuttametter enteifer 7 dis sut peina de suspensiun e d'inabilitat tiels uffecis divins. Mo paucs denton han obediu, denter quels il plevon de Sumvitg *Nicolaus Genelin*, in signur de pietat e doctrina gronda, sco il cronist scriva. La plipart han teniu la dira, sefutrond suenter veglia moda grischuna in quex dils comonds jasters.

Sin ils 11. de Schaner digl onn suondont, 1656, ein ils plevons della Cadi seredunai a Trun tiel capetel. Cun quella caschun ei era avat *Adalbert*, accompognaus dal P. *Maurus Cathrin*, comparius. Sefundont sillas bullas papalas e la convenziun cugl uestg ha el en eloquent discuors admoniu els tier la duida submissiun. Adumbatten. Gie, perfin ils paucs, che havevan tochen uss teniu cugl avat, ein curdai giu da quel. Tschun dis suenter ha il capetel de Rueun fabricau ina solemna appellaziun al papa, protestont encunter la procedura dil nunci. Il document ei suttascrets da *Luregn Cruxilla* (*Curschellas*) plevon de Siat, *Udalric Gandtner* plevon d' Andiast, *Melchior Caprez* plevon de Rueun, *Pieder de Caduf* plevon de Schlans, *Christian Calucius* (Caglezi) plevon de Falera, *Gion Caderas* plevon de Ruschein.¹⁾

¹⁾ C. Decurtins. Landrechter Maissen, Beilage 14, p. 56 dil squetsch separat ord las Monatrosas de 1877.

Alla testa dil moviment encunter la claustra ein semess landrechter *Nicolaus Maissen* de Sumvitg e domdecan *Mathiu Sgier* de Ruschein.

Il di de cumin digl glendissidis Tschuncheismas 1656 haveva aspects de daventar in di furius. En gronda massa veseva l'alva trer neutier ils umens spel Badus, *per exercitar la biala, custeivla libertat dils taffers e generus vegls, schada davos a nus tochen sin il di ded oz*, sco il cronist sexprima cun sen patriotic e gesta luschezia. Sco mistral ei vegnius elegius *Giachen Berther* de Tujetsch, il qual udeva tiella partida anti-claustrala. Landrechter Maissen, um d'energia ed ambi-zun, vuleva buca schar vargar quell' adatada caschun, per crescher ella simpatia dil pievel. En vivas colurs malegia el avon a quel las perniziusas consequenzas, che l'execuziun dellas bullas papalas hagi pella libertat della tiara, ed ils plaids digl imposant um sillar buora han buca faliu lur effect. Desperas fuva decan Sgier premuraus, de marcar las pretensiuns della claustra sco malgestas ed efluidas solettamein dall' engurdienscha digl avat. Adumbatten sereferescha quest sils documents sigilai. Cur ch'il pievel manegia cun ne senza raschun, d'esser periclitatus en sias libertats, lu quescha la vusch dil ruasseivel patratg. Cun canera e fracass sforza l' instigada massa igl avat, de extrader las questio-neivlas bullas, e sut general applaus vegnan quellas dal mistral cul cunti de sac tagliadas en tocs. Giubilont sco suenter ina gloriusa victoria ein els lura tratgs giud cumin. — Il cronist della claustra emblida cun quella caschun buc, de allegar la sventireivla sort, la quala ha silsuenter tuccau quels, ils quals havevan luvrau il pli fetg ell' opposiziun. Oravontut vegn la posteriura

tragica fin dil landrechter Maissen tschaffada si dad el
sco in meritau castig da surengiu.

Sut las dadas circumstanzias ha il nunci viu en la nunpusseivladat, de poder sforzar atras las ordinaziuns dil papa. El ha dau suenter, ed ina nova convenziun ei ils 26. d'October 1656 vegnida erigida denter igl uestg ed igl avat. Quella ha danovamein confirmau la totala exempliun della claustra; la giurisdicziun sur dellas pleijs spel Rhein-anteriur ei puspei ida vi en possess digl uestg, il qual ha surpriu de pagar persuenter alla claustra la summa de 800 renschs. Papa Alexander VII. ha sin supplicar d'omisduas parts approbau la convenziun, e cun quei ha la dispetta giu sia fin.

La relativa ruasseivladat, la quala caracterisescha il sequents decenis dil 17. tschentaner ell' historia exterius della claustra, sco insumma della patria grischuna, ha fatg pusseivel agl avat *Adalbert*, de concentrar sias forzas silla restauraziun della casa de Diu, e de menar quella encunter a nova pussonza e flurizun. La pli gronda impurtonza ha el senza dubi acquistau entras sia *activitat enten baghegiar*. Ei para, ch'il baghetgs della claustra fuvien dal temps, ch'el ei intraus en uffeci, en pauc favoreivel stan. Vid la baselgia de *Nossadunna* haveva schon avat *Bridler* mess il maun reparont; de *Medell* ha continuau culla restauraziun e procurau per in altar, ch'il cronist appreizescha sin 1100 renschs. Ella baselgia de s. *Martin* ha el mess neu in' orgla pintga cun 4 registers per 120 fl. El ha puspei alzau ord la smanatschonta decadenza il *santuari de s. Benedetg sur Sumvitg*, ha baghegiau sper la claustra ina stalla, e per la respectabla summa de 11,000 fl. acquistau las possessiuns de *Salaplauna-sut* e *Valdauna*.

Senza dubi fuva era igl avat l'olma dell' interpresa, cur ch' ils de Muster han 1656 construiu da niev ensi la baselgia de s. *Placi* dado il vitg, pli biala e vastusa che vidavon. 1658 ei quella vegnida benedida en tras uestg Gion VI. Flugi.

Fetg premuraus fuva avat Adalbert de puspei metter en flur *la via sul Lucmagn*, la quala haveva dapi in decret digl imperatur Carl IV. digl onn 1359 en favur della via digl uestg sul Septimer piars bia de sia anteriura frequenza ed en consequenza de quei era de sia practicabladat. Cun grondas expensas ha 'gl avat mess en ovra la reparaziun della via, construent novas puns a *Serras* (Russein) e tiell' entrada ella *val Medel*. Pil medem motiv ha el era fatg restaurar ils hospitals e las caplutas de s. *Maria* e s. *Gagl* situadas sigl aul dil pass.

Da 1674 tochen 1679 ha la nova construcziun della casa sill'a *possessiun claustrala a Trun* occuppau il prelat. Igl imposant bagetg culla aunc bein conservada schinumnada sala dils landrechters e combra digl avat dattan aunc oz perdetga dalla pussonza e dal sen artistic digl autur. L'administraziun dil hof ha igl avat surdau als dus conventuals *P. Adalgot Dürler* de Luzern e *P. Carl Decurtins* de Muster. Quest ei il medem onn, 1679, dalla vischnaunca de Trun vegnius numnaus caplon della capluta de Nossadunna della Glisch, ina nomina, ch'igl uestg ha igl onn suenter approbau.

Il sanctuari de *Nossadunna della Glisch a Chiltgadira* meina anavos siu origin sigl onn 1664. Vidavon steva leu ina capluta de s. Bistgeun, da quei temps curdada ualti fetg en decadenza. Tras miraculusas appariziuns, sco la Synopsis raquenta, eis ei daventau, che l' anteriura capluta ei tiella restauraziun vegnida dedicada

alla Mumma de Diu. La consecraziun ha giu liug igl onn 1673 entras uestg *Udalric VI. de Mont* (1661–92). Provedius igl emprem da caplons ord il clerus secular, ei il pign sanctuari duront la liunga e sabia administraziun de P. Carl Decurtins — da 1679 tochen tier sia mort 1712 — sesalzaus tier in dils pli frequentai pelegrinadis della Surselva.

Il diember carschent dils pelegrins ha cuninaga leventau il patratg d'ingrondir la capluta. P. Carl fuva igl emprem promotur dell' idea. All' entschatta de Matg 1681, gest duront il temps, che la dieta della ligia grischa fuva tenor usit redunada a Trun, ha avat Adalbert sut gronda solemnitat tschentau il crap fundamental della nova baselgia. E ferton ch'il Terc fageva siu davos desperau sforz, per plantar la mesaglina sil clutgèr de s. Stiafen a Viena, termettent sgarschur tras l'entir' Europa, flessiavan rehamein ord il camp ded omisduas confessiuns las almosmas en honur della surventschidra dils inimitgs della baselgia. 1684 ha uestg de Mont saviu benedir en il niev vastus sanctuari.¹⁾

Pign temps suenter che la claustra ha giu surpriu la caplania de Nossadunna, ha la pleiv da *Sumvitg*, daventada vacanta entras la mort dil plevon *Giachen Spescha* petizionau tiegl avat per in pastur dellas olmas. En convenienscha cugl ordinariat ha Adalbert de Medell en verdat termess als de Sumvitg il pader *Adalbert Defuns*, il posteriur avat, sco plevon, e sco gidorter il pader *Columban Federspiel* (1680). Animaus tras quei exempl ha dapi 1684 era Trun in suenter l'auter legiu

¹⁾ Pareglia la canzun de Nossadunna della Glisch el Cudisch de canzuns, ediziun de 1690, p. 145 sqq.; plinavon Mauri Venzini *descriptio brevis communitatis Disertinensis*, edida da C. Decurtins, l. c. p. 27.

ora P. *Carl Decurtins* e P. *Augustin Castelberg* scoplevon. Quei muossa a nus clar, con fetg la claustra gudeva da quei temps la simpatia dil pievel. Nus survegnin insumma l'impressiun, che *il pievel della Cadi ha adina tras ils pli naturals ed intims ligioms sesentiu unius cull' abazia de s. Sigisbert*. Las numerusas controversas denter il cumin e la claustra tras ils differents tschen-taners intendevan tuttavia buc la fin de quella — en critics moments ei il cumin il contrari adina cun ferm maun staus en per la claustra, — quellas ein plitost naschidas ord il pli e pli svegliont sen de libertat e la tendenza, de buca schar vegnir ella memia pussenta: *la claustra dueva dominar e survir el medem temps*. Quella idea regeva era ell' epoca d'avat de Medell. Nus ha-vein gie viu sisura, co quel ha stoviu ceder da ses dretgs acquistai sur las pleivs della Surselva, e sesmar-viglein tuttavia buc, ch'ils vegls suspects ein tiel clerus e tiegl uestg puspei selevai, cur che la claustra ha tras supreender la pastoraziun de Sumvitg e Trun danovamein ingrondiu sia influenza. Suenter haver scret bia vi e neu, al nunci *Cantelmi* a Luzern ed alla congregaziun della Propaganda a Ruma, ei sut datum digl 1. de Settember 1685 tras il nunci vegniu erigi a Cuera ina convenziun dil sequent contegn: 1) Ils conventuals de Muster san senza lubienscha digl ordinariat supreender neginas pleivs, era buca quellas, che fuvan pli baul incorporadas alla claustra. 2) Quei sa daventar en in cass de necessitat renconuschius dal nunci, e suenter che l'elecziun ei succedida tras il pievel. 3) La baselia de Nossadunna della Glisch e la caplania de s. Giachen e Stoffel a Zignau dueien cun consentiment dil pievel era dacheudenvi vegnir administradas tras

la claustra.¹⁾ Sin fundament de quels artechels han ils paders de Muster bandunau igl unviern 1687 Sumvitg e Trun, cedent egl emprem liug il plaz als missionaris capuzins.²⁾

Denton fuva igl avat sebess en ina nova interpresa pli gronda che mai. Igl onn 1683 ha el schau destruir il vegl, schigloc schon empau sgurdinau baghetg della claustra, e suenter in niev plan, quel ch'exista aunc oz, entschiet la nova construcziun. La gronda part dils religius ha el ord quei motiv per dus onns repartiu sillas differentas claustras della congregaziun *Faveras, S. Gagl, Rheinau*, sco era *Murbach* egl Elsass. La claustra de Muster ei vegnida dispensada dallas contribuziuns pella congregaziun, dallas qualas ella para zvar era d'auter temps buc esser stada molestada fetg. Il niev baghetg mava denton mo plau vinavon. Las enormas expensas seschavan cuvierer mo tras emprests, e la disciplina claustrala stueva naturalmein pitir sut talas circumstanzias. Igl onn 1694 ha igl avat stuiu udir seriusas admoniziuns da quellas vards silla redunonza della congregaziun tenida a S. Gagl. Cheu ei vegniu priu il conclus, de reparter danovamein ils religius de Muster sillas claustras benedictinas svizzeras, e de permetter leu in capavel administratur.³⁾

¹⁾ Egl archiv episcopal a Cuera B, Nr. 39, sesanfla in grond fascichel actas, che serefereschan sillas controversas denter igl uestgiu e la claustra duront il 9avel deceni dil 17avel tschentaner. Leu ein era aunc entgins auters documents relativs alla perioda d'avat de Medell d'enflar, ils quals han buca, ne mo sin nunsufficienta maniera, saviu vegnir tratgs a nez ella presenta lavur.

²⁾ Mira Storia delle Missioni de' frati minori Capuccini nella Rezia, dal P. F. Clemente (Trento 1702) p. 451.

³⁾ Moriz Hohenbaum van der Meer, Chronicon Desertinense, manuscret (copia) egl archiv claustral de Muster, p. 148.

Igl ei cheu buc il liug d'intercurir pli datier, schebein ed en con lunsch il proceder della congregaziun era fundaus. Ton ei franc, ch' avat de Medell fuva in um, che saveva era defender cun vigur ils interess della claustra. Las entradas de quella sefundavan naturalmein oravontut silla rendita dils extendi beins schischents, sillas dieschmas ed otras grevezias dil pievel, sco era sils products ord las minas metalicas en *Tujetsch*, sigl itschess de *Muster*, ellas alps *Nadels* e *Punteglias*. Quellas vegnevan dapi il 15avel tschentaner dalla claustra e dal cumin gudidas en communabel possess, e per ordinari schadas vi per tscheins a privats en ed ord il cantun. Sco da tut temps ha ei era ella perioda d'avat Adalbert II. buca muncau tals, che levan sesustrer dallas obligaziuns visavi alla casa de s. Sigisbert. Il cronist menzionescha pliras dispettas pervia de dieschmas giud beins sigl itschess de *Sumvitg* els onns 1666 e 1667. — Las *relaziuns denter la claustra ed il segneradi dil Munt s. Gieri* fuvan dapi l'acquista de quei territori tras avat Gion VI. Schnag (1472) adina stadas empau incertas e tuorblas. Ils 16. de Schaner 1674 ei, „per evitar process, cuosts, malaveglias ed otras inconvenienzas, sco era per plantar vera corrispondenza e buna entelgienscha“, vegniu tschentau si la schinum-nada composiziun de *Tavanasa*. Quella contegn precisas stipulaziuns concernent dertgira, elecziun dil mistral ed auter. Nuotatonmeins sesanfla il cronist claustral el cass, de paucs onns suenter (1682) stuer selamentar petramein sur in disturbi instradaus tras ils ded *Uors*, cun caschun ch'ils de *Pigniu* ed *Andiast* fageyan ina processiun tier Nossadunna della Glisch a Trun. Miez

tschentaner pli tard (1734) ha Uors totalmein secum-prau ora dal domini della claustra.¹⁾

Sper sias biaras ulteriuras occupaziuns schava avat Adalbert buc ord egl la vart religiusa de siu uffeci. Igl onn 1658, il di de *s. Placi e Sigisbert*, ei cun lubienscha dil general dils Carmelits vegniu erigiu en claustra *la confraternitat dil s. Scapulier*. Era las fiastas dils patruns della claustra dils onns 1671, 1672 e 1673 ein stadas accompongadas da extraordinarias solemnitats. Sin quels dis ha giu liug la translaziun dellas reliquias de *s. Purpurin* e *s. Eliana* (1671), de *s. Adalgot* (1672) e de *s. Teofil* (1673). Las empremas haveva avat Adalbert obteniu sco schenghetg dal secretari dil cardinal Frideric Borromeo, *Felix Paradiso*, las davosnumnadas dal cardinalarzuestg de Mileun *Alfons Litta*. Il tgierp de *s. Adalgot*, avat de Muster ed uestg de Cuera (1151—1160), dapi tschentaners enneu restaus zuppaus, ei igl 1. de Juli 1671 ventireivlamein vegnius descuvretgs en ina cripta da maun dretg della porta de *s. Martin*. La solemnitat dell' elevaziun e translaziun han tras lur preschienscha augmentau igl uestg de Mont, plirs canonis de Cuera, tuts ils spirituals dil capitel sugl uaul e biars delegai dils cantuns catolics e dellas claustras svizzeras. — Fideivel agid ha avat Adalbert prestau agl uestg de Mont, cur ch' ei setractava de promover *la restauraziun della claustra de muniessas de Kazas*, sligiada si els embrugls della reformaziun (en-tuorn 1565). Da glez temps eran ils ualti considerabels

¹⁾ q. v. d. arisguard la dertgira pintga e gronda e l'elecziun dils offizials; la dieschma haveva Uors schon 1540 cumprau liber. Documents publicai da Muoth, die Herrschaft St. Jörgenberg im Grauen Bund, en: Bündnerisches Monatsblatt 1881, p. 100 sqq.; en regest tier Mohr, Regesten von Disentis, Nr. 297, 329 e 332.

beins de quella vegni reparti sils cumins della Part-sura. La suprastonza della Cadi ha ord tals daners surdau la summa de 248 renschs agl avat *Christian de Castelberg* sco fond per ina scola claustral. Quella ei sut il successur de Castelberg en verdat, schegie mo per circa 10 onns, passada en veta, e pli tard puspei sut *Augustin Stöcklin*. Avat de Medell ha sin las supplicas digl uestg, malgrad che l' obligaziun della scola visavi al cumin para de haver existiu vinavon, generusamein restituiu alla restabilida claustra de Kazas per igl importo retschiert ensemblamein culs tscheins la summa de 600 renschs.

All' entschatta della perioda de nies avat fuva il convent de Muster aschi fleivels, che dus paders de Rheinau, *Sebastian Hertenstein* e *Nicolaus Landolt*, han in suenter l'auter stoviu vegnir postulai sco decans della claustra. Prelat Adalbert ha puspei fatg flurir quel. Il cronist ha salvau si a nus ils numbs dils per part schon menzionai paders *Maurus Cathrin*, *Sigisbert Tyron*, *Joscius German*, *Carl Decurtins*, *Adalbert Defuns*, *Augustin Castelberg*, *Adalgot Dürler*, vengonzs fegls de s. Benedetg.

Vid il maletg d'Adalbert II. muncass denton enzitgei essenzial, sche nus schassen nunmenzionau *il scribent*. Ei surpren nus ina gesta admiraziun, vesent co igl um, che ha interpriu e menau atras tontas fitschentas, antla aunc tschaffen e temps tier meriteivlas lavurs literaras. E l'impressiun de quei fa a nus ton pli bein, essent che l' historia della claustra muossa a nus era autras periodas, dallas qualas ins astgass en quei risguard pretender enzitgei dapli, che quei ch' ellas porschan. Avat Adalbert ha scret differentas ovras asceticas e historicas. Ultra della surallegada dissertaziun numnein

nus in cudisch de meditaziuns en romontsch pils „fratres conversi“, che capeschan meins bein il tudestg e latin, in tractat giuridic concernent ils dretgs della claustra visavi al cumin, ed il „Catalog dils avats“, sia ovra principala. Sin fundament dils documents egl archiv e dellas cronicas dils avats *Bundi* e *Stöcklin* ha Adalbert tschentau ensem en' historia della claustra dall' entschatta tochen sin siu temps. La preziusa scartira, sco insumma tuttas lavurs manuscrettas digl avat, ein tiel barschament dils 6. de Matg 1799 idas a piarder. Fragments dil catalog ein conteni en auturs dil 18avel tschentaner, la *Synopsis*, *Eichhorn* e *Van der Meer*.

Igl exemplel digl erudit prelat stueva influenzar sils confrars. Denter quels han principalmein dus sefatg meriteivels tras activitat literara, *P. Maurus Cathrin* e *P. Carl Decurtins*. Igl emprem ha duront ina perioda de vitier 20 onns administraru cun distincziun igl uffeci de decan, e fuva desperas in premurau promotur ed augmentader della sacristia e biblioteca claustral. El ha concepiu diversas ovras religiusas, aschia in commentar tiella regla de s. Benedetg, meditaziuns per la cureisma, in calendari mariano-benedictin en honur de Nossadunna, componius ord sentenzias de sogns ed auters pietus umens digl uorden de s. Benedetg etc. P. Carl Decurtins ei igl autur d'in' ovretta sullas miraclas de Nossadunna della Glisch, succedidas tochen 1711. El ha, sustenius dals confrars, tschentau ensem il renomau *cudisch de canzuns*, squitschaus per l'emprema ga a *Nossadunna sper Trun* igl onn 1690, plinavon in *cudisch de s. Giusep*, squitschaus a Muster 1691, la *Clav dil purgatieri*, Muster 1712, ed auters.¹⁾ Cheutras

¹⁾ Mauri Wenzini descriptio, l. c. p. 28.

havein nus era schon indicau in fatg de eminenta impurtonza ell' historia literara e culturala della Surselva romontscha: *la erecziun d'ina stamperia claustrala a Nossadunna ed a Muster.* Igl emprem tochen uss enconoschent squetsch a Nossadunna ei da nies saver il „Codesch della soingia messa con ina biala e nizeivla forma per bein se recommendar a Diu la domaun e la sera e per igl di ora, tras ils Religius della Claustra de Moster“, ord igl onn 1689,¹⁾ ed igl emprem squetsch a Muster il „Scazi spiritual dell' olma fideivla“, ord igl onn 1690.²⁾ La stamperia surveva bunamein exclusivamente alla propagaziun de cudischs religius denter il pievel romontsch. Ovras d'auter caracter, scaffidas en claustra, ein per la gronda part restadas en manuscret, ed ord quei motiv vegnidas destruidas per adina tiella catastrofa de 1799.

La fiasta de s. Placi 1695, embellida tras la preschienscha dil 1692 nievelegiu uestg de Cuera *Udalric VII. Federspiel*, dueva esser la davosa per avat Adalbert II. Gleiti suenter ha ina malsogna mortala surpriu el e menau neutier sia fin ils 11. de Fevrer 1696. Ina edificonta, beada mort ha encoronau quella veta, dedicada trasatras al survetsch de Diu. Ils 14. de Fevrer, sillla fiasta dell' enflada dils corps de s. Placi e Sigisbert, ha sut gronda participaziun da pign e grond la sepultura giu liug ella baselgia de Nossadunna. Il medem onn ha la claustra tras la mort era piars il subprior *P. Sigisbert Tyron* ed il decan *P. Maurus Cathrin*. Sco niev cau ha il convent ils 22. de Mars 1696 tscherniu ora il tierz dil num Adalbert, il gia repetidamein men-

¹⁾ Exemplar ella biblioteca romontscha della claustra

²⁾ Ed. Böhmer, Verzeichnis rätoromanischer Litteratur, p. 117 e 124.

zionau *Adalbert Defuns*. Quel ha fideivlamein suondau ils fistitgs schai davos da siu antecessur. Sut el ei il baghetg della claustra vegnius menaus alla fin, e la baselgia gronda consecrada ils 11. de Settember 1712 tras il nunci *Caraccioli*, sco l'inscripziun sulla porta de quella indichescha aunc oz agl attent pelegrin.

Avon che prender comiau d'avat Adalbert de Medell, lein nus aunc dar in' egliada sigl uopen, che paradescha tagliaus en crap sul portal della claustra. El ei partius giu en quater parts: sisum seniester e giudem dretg observein nus la crusch de s. Andriu, l'arma della claustra, sisum dretg in liun, l'arma dils de Medell, giudem seniester in pelican, l'arma dils de Castelberg, la schlateina paterna e materna d'Adalbert II. Igl entir representa igl uopen de quei avat. Quel sesanfla denter auter era maligiaus sulla porta della baselgia gronda della claustra endadens, e vid il plantschiu-su della sala dils landrechters e della combra digl avat el hof a Trun, dont perdetga digl activ baghegiader. Cun tutta raschun lauda il cronist igl avat de Medell sco in um de speziala prudienscha, pietat ed inschignusadat ellas fitschentas. Sia activitat meretta ton pli nossa admiraziun, sche nus udin, ch' el fuva savens molestaus da maldispostadat. *Mo l'autta idea, ch'el haveva della clamada surdada ad el dalla providienscha, ha fatg el nun-balucnts en buns e schliats dis.* Ed il success d'in regiment de varga 40 onns ei avunda, per segirar ad avat Adalbert II. per tut temps in *plaz d'honur* ella venerabla retscha dils prelats de Muster.

Dardin, egl October 1896.

Dr. G. Cahannes, cand. theol.